

思古樓詩定之題

冊四

PL  
2765  
.J22  
v.4





YORK UNIVERSITY

JUL 3 1997

PLAZA NORTH BUILDING

卷十三


庚午元日作

新歲更敬

昨日既云除今茲即嘉辰昂馬首來應龍化爲龍狀  
龍帝后前持我酒與豚勿謂所願奢而斯施以仁但願  
此身健長作持母人飢執袒不藏來假衣於春恩能與  
憂德力可任善辛歲功雖云改敢望百事新惟期一家  
安毋似昨年迎

題陳柱尊桂林圖卷

腕底胸中顯怪奇無聲詩匹有聲詩是般通運川流





YORK UNIVERSITY

JUL 03 2001

EAST ASIAN STUDIES

## 忍古樓詩卷十三

庚午元旦作 以下庚午



新建夏敬觀

昨日旣云除今茲卽嘉辰昂昂馬首來儻能化爲麟伏  
 籲帝后前持我酒與豚勿謂所願奢而靳施以仁但願  
 此身健長作侍母人飢執粗不藏凍假衣於春愚能蠲  
 憂傷力可任苦辛歲功雖云改敢望百事新惟期一家  
 安毋似昨年迤

## 題陳柱尊桂林圖卷

腕底胸中鬪怪奇無聲詩匹有聲詩是巖通逕川流峽

使墨如煙筆似錐  
匝地徒歌驚上界  
彌天豪氣壓南陲  
平生塊壘能澆否  
祇許扁舟酒伴知

寓園春事漸盛次庸庵尚書韻

海上風來戶闌排  
日華收雨午當階  
便催花信三三徑  
暗記春光九九牌  
泓後流年兵未已  
秦家月令候多乖  
人間冷暖關翻覆  
誤字分明寫別淮

喜夷倅北至再用前韻

花下蜂衙午乍排  
大聲忽訝客升階  
預鋤越塢貓頭筍  
請話唐宮鹿角牌

禁園久縱人游觀夷倅言在都惟日就舊日侍從之地一啜茗以自遣

四座一時增慨歎  
兩春重見慰離乖  
青齊正墮烽煙裏



不識先生怎渡淮

挽馬通伯

桐城富文獻君殿姚與方道如帶未絕存者魯靈光爲  
學嗜性命老味逾芥薑側手障橫流以堅儒大防君始  
作詩說我持鄭譜商尚論國風次升降疑檜王我時好  
齊詩特欲星野詳天宿燦箕斗運樞握中央東遷寧貶  
尊百代明紀綱未敢從世紀值之柳星張君書採漢宋  
識解今歐陽定本我未見別君遂南行憶君裘氏地

時君

住京師  
裘家街

茗坐書史旁在膺兩默契爲君題所藏驥隙馳

十年涕下駭君喪誠不隨骨朽其言千載昌眷思懷和

畢含悴氣類傷

爲俞慎脩題清湘老人松水行卷

妄人發墨鳴其高俗眼嗜之如魔妖清湘何曾棄規矩  
無本而學無分毫我觀是卷神理超豈有一筆相混淆  
叢篁灌木風刁騷挂藤如帶僊飄颻欲臨之繫吾腰  
失足恐墮萬頃濤闢筆酣肆出麤沈師古爛熳入神品  
成似草草不經意心印在中須細審先生何曾不惜墨  
點墨寫作松水色二百餘年燦然黑光照俞君几案側  
俞君法從外家得

慎脩自童幼卽學畫於其叔  
外祖山陰沈詠孫先生翰變化盡

致吐胸臆試爲世人祛其惑毋令誣古飽硯食



梅間雜詠

梅枝密交互花若萬玉攢中有么禽飛未嘗礙往還有  
時側毛項眼揀一朵看客來何闐然驚起花翩翩

日午梅作市羣蜂來趁墟懸足住空中微吟嗅其鬚有  
時過別花亦或緣鄂跼風吹不肯去晚來自稀疏

風吹落英舞翩然萬胡蝶中有稚粉羽輕明似花頰眼  
昏不能辨飛飛還跼跼試抱一花牢莫許風干涉

爲陳庸庵丈題所藏翰墨和鳴館梅花八幅卷

翁家八幅梅曾壓五經擔家法溯墨林生色寫東絹乃

吾婦大母小印朱文燦

每幅均有項屏山及上元翰墨和鳴館小印

煌煌堪

喜齋末幅置題翰初付學士收繼持答羔雁亡筵慶珠

還二嫌惜分散

內子謂原係十幅

緬懷道咸盛入龍世譽擅父

子直南齋賜犀隆帝眷

賜犀僊館爲仁山學士齋額

風流照一世餘

藝付才媛女孫解弄筆塗抹我共硯摩挲撫遺跡借作  
經旬玩庭前梅正花相看雙爛熳

雨後池上

掃除一鑑雨澄鮮樹影翻身倒指天恣意游魚登石級  
頻來吐沫岸花邊

一風忽落池塘面水靜無端片殼生更打枝頭好花瓣  
疏疏數點逐魚行



林鳥不知吾坐久漸飛漸近水西亭動搖恍似秋千女  
傍耳嬌啼最好聽

櫻桃花

兩樹層層堆密蘂杏花開總後朱櫻曉來一撫樓闌望  
東樹渾如瑪瑙明

杏花

西樹輕明忽照空脂光淡與粉光融絳趺點向煙綃潤  
色比櫻桃更不同

聖俞比以薄羅裳介甫尤憐不整妝花盛花殘俱可賞  
這般詩句耐思量

玉蘭花

裊裊蜺旌下帝都  
森森粉障挂平蕪  
眼明坐對斜陽久  
我欲賡天一字無

題高野侯扇頭畫梅

曾見荒山有此株  
苔皮皴皴未全枯  
東風一動數花發  
借與梅王作畫圖

題倪鴻寶書古盤吟畫石卷子

壯懷被挫烏程奸  
張燈四照飛閣闌  
石齋一言起顏放  
答語披露平生肝  
書如番錦石蒼壁  
憑紙堂堂見真色  
拚將餘瀋浪塗牆  
畢竟埋名能死國  
再起朝廷事益壞



一息猶存寧得懈忠魂曾不返衣雲豈似盜名欺世輩

贈董季友

光宣初詔嘖室議曰將下聽聰不蔽我吳君越同儔功  
憲度先明星紀次御奔秋駕條羣駭事有爲山虧一簣  
回頭陳跡散如煙再徙陽人周遂旣閱今廿年君七十  
看倒三松到何世狂波孰障南北疊斛土徒思華信致

詠史

清角難爲德薄聽此言精妙孰知音固知彭祖多熒惑  
不分當前浪說琴

不道溫公語庾王平南見代遽相忘當時豈有周旋地

覷破貪夫倚被囊

興公流涕哭真長  
借面來過季野旁  
若要慙屏後聽  
座中無復簸粃糠

一窟居澄一窟敦  
品題固未出王門  
阿眉何地容名父  
却道阿平日妄言

仲文生意早婆娑  
無奈珍奇化土何  
腹儉那曾袁豹半  
鏡中失面愧顏多

題王式園時賢書畫集

與君謀議略相同  
罷去都無尺寸功  
百輩棄才生並世  
畫名書譽兩牢籠



題陸丹林時賢書畫集

時儔雖非及古人後之視此亦先民賢於質鼎河豚味  
不見真龍一爪鱗

贈別黃篤友北行

數年東海頭客聚勤觴酌肴覈文字間斷句見精博君  
學有宗傳父書寶囊橐世降苦不售空懷醫國藥來爲  
入社人亦謂賢奕簿別去更何遣恐少朋儔樂老貧就  
兒養等非鄉里著況此麥秀時蒿目過商亳明朝聞當  
發帆海風正惡念君中所持吟嘯宜自若

盛省傳師挽詞

名郡瀕滄海儒宮傍廟堂觀濶齊德量近聖示周行每  
見稱先哲於斯立大防平生坐間語追記敢遺忘  
門牆固多士問學我尤親進德曾何有裁狂賴獨勤挈  
裘當要領傳火付勞薪墮淚琴書側蹉跎愧學人

題方蘭坻臨文徵明魏塘梅花庵圖今爲貴筑朱

用和所藏

魏塘春闕庵子曠花光如雪竹如嶂一生夢繫煙水鄉  
平世家居了無恙當時得住不解住我亦揚帆走波上  
路旁見之記在紙作念歸老終是妄無舟可買澤可漁  
安得卜如畫中居硯食老媿方懶儒拔足出門無坦途



試看畫中居人與行者亦是一幅太平歡樂圖

爲俞琢吾題淞西草堂人日詩畫卷子

江梅涉七花乍縵作伴水仙倚松竹覽茲節物在丹青  
猛省年光轉車轂淞西作會今幾春世事紛如棋換局  
此圖纔閱兩人日曾

重伯金句丞

姓名入鬼錄菜盤飮

鉅憶在眼斷句微吟杯爲覆邇來陳

散原黃篤友更別

去君手一編閉牆屋赫風灼宇作麼念正類詩囚駢桎  
梏

楊如軒母百歲

父子邊州豪崛起氣自雄賊來作扞衛奮臂挈義從一

戰竟捐軀孤女能興宗敢禹世名將爲義欲免戎才武  
繩厥祖豈非檢誨功緬維避寇初母女走箐中一夕歷  
峻坂九折過溪峒履險嘗若夷勝天窮者通有德斯不  
隕精力內亦充至今獐獠間疑乘兩茅龍從來天威徑  
蹶角拜武蠡令子倘歸治民俗定阜豐板輿佇觀聽恢  
崇懿和風道旁輿人歌母老耳更聰

爲程穆庵題陳師曾墨壺刻畫拓本

鐫金始山巒寫作山雲態此誠古遺法堅於絹紙績誰  
云骨已朽死友墨緣在氈蠟挂牆壁馨香坐相對廠肆  
買墨壺寶孰均鼎鼐惟茲故人筆什襲倍珍愛因君篤



舊思感逝有同慨

左姑母八十壽

天姿秉聖善至德脩幾微以茲致久長豈是覆幬私我  
姑耄耄年履險化爲夷自頃城構兵驚烏噪庭枝鄰火  
忽暴發雷動屋北陲寇去他寇乘凶殘更倍蕪焚掠徧  
衢巷枕藉橫衆屍我初聞此亂竊竊私憂危又念地下  
人我姑懷乳兒顧我姪兼壻遠在窮海涯婦亡不急難  
愧忤生涕洟事定得消息鎮靜如常時始信內貞固毋  
懼震撼爲涼秋八月望將值拜慶期我當於是時跪地  
捧一卮祝國銷兵戈祝姑進期頤有德召吉祥不待卜

龜著

黃浦園坐對月

地車一西翻舉境黑如墨案頭親燈火老眼漸虧蝕幸  
有月返照人間知夜色得水意更朗遂步浦江側川湄  
夾鬧市仍苦勢相逼巨艦橫中流衆槎復旁塞憑闌貪  
江光僅覩波路仄我心如太清何物滓胸臆近持多言  
戒惟對月可默但認月魄中始是清涼國凡物皆不生  
方免外見賊

哭余堯衢

盤盤矍鑠翁骨肉還歸土魂氣返太素諒非死能腐病



床六十日每視傾肺腑彌留作永訣執手不得語先公  
門下士君最見峯距至今章江流嗚咽送君浦去官由  
執法失君如失怙昨日駭君喪吾妻寢地

公邇來二十

年海角相溫煦視吾若弱弟無言不吾與精誠開金石  
詩歌振鍾呂我聲每嗽發感耳輒相許平生寡交遊朋  
友稀可數徒緣文字契未必喻甘苦性情世冰炭漂山  
衆吹响君則異於我兼容亦並取寢門諸弔客莫不飲  
君醕懷忠須埋名虛謚抑何補坐念功利人懷挾類善  
賈君旣蓋棺去瞑目得其所置前用吾縑寄淚瀝在楮

### 哭譚組安

升堂叩靈床形體若靜寐拊膺念疇昔零灑應心淚自  
來彌天人戢影一棺內生存不世功每遭俗情忌君抱  
澄清志隻手起攬轡經緯紛萬端艱危寧得避牢籠要  
德量隱忍救崩壞君雖默無言我知所全大身病國未  
安今竟死勞瘁追維遜清末君豈在其位是時諸大夫  
比比亡國輩庸者惟素餐黠者通姦利終焉社傾覆責  
固有攸在自茲欲求治賢者詎容退我言是非公目論  
殊忸怩顧我長錄錄負君益滋愧

題劉翰怡希古樓圖

南林溪畔水青青近接龍威洞渺冥架屋竹間廊自迴



著書松下戶長局琅環得地鄰完璞綸綍從天比善經  
我亦樓頭題忍古報君時伴一甌醺

爲沈貞齋題疏燈殘夢圖

君家太湖邊有月夜皎皎對此應不眠奚夢得相擾纏  
綿一枕衾翻被短檠惱無夢眼作惡入夢更顛倒試於  
欲睡時常將俗情掃膏火勿自煎合目直到曉

贈葉玉虎

與君總角交初面在吾里言談孰最超一座服神理躍  
馬東湖孺先馳騰駮駟視我乘蹇驢崎嶇豈勝箠黑頭  
收功譽宇內見方軌身閒且著述猶住日中晷堂堂應

仲遠連綴狀人紀洽聞溯石林等身已婉美

題宋闕詢絳守居詩石刻後

朱輪行部歷花厓伸紙題詩絳守齋正似樊文存片羽

護持一石蠟摩揩

石刻治平二年首題轉運使兵部郎中直龍圖閣閣詢與宋史本傳合

題鮑桂星荆南詩卷

先驅負弩入沙渠詩卷隨身一使車分陝以東南郡近

采風應是本音初

廩君赤穴夜茫茫今亦羣飛蔽日光追想承平端士習

秀才低首服文場

和曹纓蘅

經沅

移居詩



故都回曉在天東。禾黍油油。夕照中廟市。借春防意盡。  
宮南溫夢。欲誰同。隨身攜有五車富。當膝穿須一榻空。  
我擬北游求史料。張柔定是主人翁。

題陸丹林頂鼎感舊圖

以下辛未

白首青山願已灰。小亭夢占一方苔。行煙縹緲成追憶。  
知繞闌干日幾回。

自題黃山十松冊子

屈作婀娜枝。插向佛瓶鉢。中藏甘露味。庶解衆生渴。

楊枝

灑淨松在觀音大士石上

耳聞落子聲。殘壘儼相對。看此無盡劫。未見有成敗。

棋枰

松在丞相  
觀棋石上

秦皇去已久何慕浮雲貴天上多至尊相奉亦可畏何

似榜無名散髮弛冠帶簪纓松在仙人觀榜石上

杖屐不吾助巖谷摧心肝夢若身鴻毛風吹一往還怪

此蒼髯叟矗立兩山間鬱然橫枝柯巧為作飛闌接引松在

始信峯頂兩崖間飛橋下臨深谷松柯作闌以導客

鱗鬣一飛動嚙今樹巉巖雲露化為汞石齒排清巖孔

生道久窮太息吾老聃空青豈可得惟持葦蕭甘擾之

孰有智匠石徒夸談沈木倘在淵已矣舌自箝擾龍松在始信

峯下散花塢一峯矗立數仞松生其巔



有山旣不住入山復何爲看盡往來客去者不可追

迎送

松在文殊院前

手持五丁鑿不容石無罅至誠果爲開勇力宜可借誰

歟能植茲疑是康干化

破石松在清涼臺下臨北海松根丈餘穿於石罅

巍巍青瑤壁今古形未改老柯懸空間霧露炫光彩清風一動搖飄落珠百琲羣峯復奚似揚帆走雲海如此

欲何之吾爲乘者殆

倒挂松虛懸峭壁

平生識宜樹萬態惟睡好常將霧作衾更喜石堪抱借問行路人誰見何年倒猶嫌出岫侶行藏太草草

臥龍松橫

踞道旁

秀才漫自誇吾家有青氈曾媿箕股僧了未識中邊萌  
心不低下枉作承座蓮正欲伸一掌斷取彼大千

蒲團  
松可

坐十  
數人

牡丹謝後作

風雨無恩祇作仇粉房零落小山邱可人顏色餘些子

一夜驚雷復見收

若道憐花春少功來春依樣費春工不愁歡墜須能拾  
歲借溫柔慰老翁

送春詞

林間雜花午亂飛餘才繡作錦地衣供人賞玩未饜足



祇令蝶大蜂子肥春工力疲將逃歸勢如逸馬不受鞿  
一旬兩旬爭芳菲得歡無幾徒增悲我前告春今有辭  
爲花延命去稍遲日色宜薄雨宜微任花開落莫苦催  
約春休與吾願違來歲須悟今日非

答何肖雅

誰料忠言卽罪言虧成事後枉追論迹疑荀彧寧能免  
腸出揚雄那復存且引醇醪三爵盡試燒寒玉一鑪溫  
與君患難俱身歷更憶甘棠在植園

贈許季純

世眼癖好鄧與包塗黑一紙俗且驕斷爛北碑木閣帖

下筆屈缺摹剗彫許君直接長史掾臨池雅度翩冲霄  
師古骨法更營造增減肌肉難分毫絕倫之技出顯悟  
層達契妙如剝蕉目取徇俗豈解此燕石得值徒爾高  
祝君持道示洪遠腕底正氣驅羣妖

感事二首

跡嫌干位始共頭豈復如生戴冕旒玉碗題年曾改葬  
不知宗賊類王不

露髑暴骨忍經過可欲共如盜發何曾是霸陵惟瓦器  
芷陽金玉殉何多

題李木公肥遯廬圖

子師明易說述古有益損取義不改字子學知所本蜚  
蜚形之訛於訓飛爲允冥鴻避憎繳語發輔嗣蘊子用  
顏其廬不係識尤敏亦兼饒裕義非若枯槁隱理慾戰  
勝肥忘飢載其糗徐黃爲寫圖紙半作橫蠹乾體虛而  
容艮勢絕天遠留餘不割棄子旨約而婉

爲梁衆異題所藏漁洋手寫詩稿

篇篇愛好翻取厭斷簡零編差可賞我曾窮日咀精華  
不識羚羊與香象此卷遺墨稀足貴令我眊昏眼朗朗  
少作濃圈殊自喜老作欹斜彌倜儻才名聲氣壓一世  
二三排詆百標榜文章潛與世運移敷暢元音借浮響



關雎刺晏首四始尼山詩道存吾黨付之不采等無譏  
毀譽兩端皆未廣

爲朱犀園題藁子易白簠

朱侯手持列國器示我釋者徐褚童嘉文密合嘉嫺盤  
旁體小異沈兒鐘古來以草名地國研考正類敦有莘  
末云永壽殊永寶趨亥孟姜相侔同徐君更證嘉家通  
本經立說尤折衷此簠不必出鬻熊可寶要是秦前銅  
朱侯寶之顏其宮好古絕似簠齋翁

爲黃溯初題敬鄉樓圖

樓窗近眺海山青接夢衣冠列古靈浪惡鯨吞寧可饜

夜寒雁過不堪聽君猶守闕依桑梓我最披圖痛鵲鴒

卅歲客遊書散盡難招沈魄在宮亭

溯初諸弟早亡一弟水死與余遭際

相同而余三十年不歸楹書在南昌青雲譜亂後散盡矣

### 題東山賭墅圖

南渡衣冠孰可師謝安高屐步當時可憐齒折東山石  
未料何人是勝基

衣紋中矩面頤豐筆法相師盛浙東骨趣內成由巧歷  
山陰道上晉人風

### 輓馮渠安

鍾瑾外家性邴原東魯學後生誰似子冶釜一金躍子

從海外歸屢過款杯酌方期交忘年吾階勤子屬劬志  
病鋪肺竟乏起死藥藏骨木區區皦然全天爵

颶風挾暴雨海潮至寓園一夕四面皆水

島風飛捲海西流橫絕崩騰夜撼樓便恐門前大楊樹  
破窗舞向枕函頭

倚屋真無可恃林危巢棲息共驚禽風頭挾水深無比  
懼似珊瑚海底沈

水退口號

秋陽愧泥陌三日未烘乾客無下脚處我出亦艱難

七月十五夜月



島雲冉冉起行空西去紛如絮逐風看似月華能反走  
可真回向玉闌東

喜石遺至兼貽柱尊榆生二子

不見詩翁今七年朱顏似昔步如仙能於蜚雨蠻風裏  
來自金堂玉几邊酒座可談惟老學講壇所貴更親傳  
吾衰喜與秦黃友重是坡門一輩賢

二十六日龍潭道中作

柳梢露處起飛瀟百里能容幾樹高含潤山峯沈日色  
無涯田水合江濤桑榆無力回遲暮鵝鴨知恩在羽毛  
載我夢魂今入杞此車銜尾似連艘

贈梁衆異

子之來去何飄然月餘兩渡滄海船再來已挾秋氣至  
吟骨在腋如飛仙昔日示我但律句一鱗一爪見未全  
昨朝袖出詩一卷窺子五字長城堅古人骨朽語不朽  
子更有穫爲糜鱸座中談命或擬子明歲未必安座甌  
我疑得位不得志事功於子何有焉較量半世所成就  
孰似文字真可傳

東鄰犬場罷廢

草肥風疾又三霜吠我寧聲耳漸忘試看崖柴韓逐魏  
勃焉興起修焉亡

答張韓齋同年

當年一敗失三韓，挾策公車欲上難。  
賦命與君同甲子，歷官如夢過邯鄲。  
我生逢亂寧無已，垂老追思更少歡。  
事變相乘遂今日，可堪重倚國門看。

自題懸崖松畫幀

老松不肯羣木儕，暉暉樹在千丈崖。  
九霄霧露涇鬢髮，仙髻倒插青玉釵。  
笙簧得地自清暖，細籟奏與天風諧。  
平生謝却匠石顧，俯惜廊廟污塵霾。  
十年踏破雙棕鞋，立足那得與此偕。  
默寫其氣遺形骸，雖墮人海舒我懷。

哭李子申



聞子蓋棺日廚糧隔宿空交深我兄事道喪各途窮國  
豈忘求舊恩難預飾終丹青寫香草肯及佩幃充

李木公遺宣紙高麗貢箋凡七十二幅皆咸同舊

製賦此報謝

宣州滿谷青琅玕復有鯁尾烏斑爛乾隆製作御用紙  
今日數金沽一番坊市凡品新且劣興味蕭索下筆難  
木公舊篋出什襲年代識在咸同間善書不自備揮翰  
贈我塗抹施青丹知君愛我重我畫心手不應真癡頑  
晴軒几案鋪白玉快意一寫胸中山此紙法古由手漉  
漂脂勻簾烘焙乾取材爛浸大溪側千指初耐敲冰寒

時平物力自豐厚更入歲貢從三韓世降百工遂凋敝  
中國萬物求諸蕃疊徵所造亦稀有彼土非復吾東藩  
辛未重九偕林子有謙宣昆仲徐紹周梁衆異黃

公渚游吳中諸園登虎丘天平感賦三章

涉足舊游地所覩如夢幻故家半彫零城市亦改換此  
邦稱天堂處勢殊四戰民柔誠易與開府降爲縣策茲  
冀保全豈盡父老願歷我治事廳追怵倉猝變

滄浪亭  
舊爲吾

服官治  
事之所

池亭多易主或去置不繕拙政尤荒涼欹斜破

廊館獨有寒山鐘欺世名深篆覽此廢興跡默坐成孤  
歎

廿年興者廢官物久不省括財務不急築此馳道騁譬  
若破殘家荒飮猶一逞吾游雖甚便歷茲殊耿耿馬行  
鞭使速遂造虎丘頂究之少佳趣何似緩放艇登臨要  
疎散所忌在俄頃一覽令無餘徒然殺風景

俄頃敗我興不識底事忙差慰一叩舷曲折達范莊捨  
舟就藤輿捨級到僧房長楓雖未頰氣自挾嚴霜雨至  
不及頂此來腰腳強勇登先吾友肯負晴重陽撫視磊  
落石夙昔蓄肝腸默寫作畫稿放出煙雲囊緬懷廿載  
前傍家歲寒堂當境未覺好事過煩思量山色幸未改  
老眼渾無忘



爲程子大題所畫東坡雪浪盆

中山太行東遠視千疊嶂眇小一拳石巧效大峯狀白  
脈挂自巔激流下成浪譬沃胸魄壘吾持喻坡量吐辭  
含譏鋒那得免逐放曷不攜與俱佛前並供養平生學  
畫水二孫非可望漫比蜀離堆吾手毋乃匠程翁貌茲  
石下筆神自王一樓對窮海忘念鹿川漲庶招南遷魂  
移盆臥相向

陳巨來見示吳湖帆所贈依梅村畫中九友各臨  
小幀冊子因題其尾

醜籀一紙畫未肯俗物施高韻胎氣骨下筆無凡姿昨

觀九小幅寫與陳安持自董迄瓜疇追摹出精思畫中  
喻交情聊取梅村詩安持今印人篆刻法鼎彝其理通  
於畫士氣兩尚之用茲作瓊玖投報良匪私從來抱道  
士貧食一藝微求乞有不與焉可指以頤却笑衡山翁  
未爲方楊知

題陳巨來安持精舍圖

方君北去復南還見否巫閭類越山便道屋廬無着處  
顏齋姑向印文間

鏤文九鼎鑄雖工禹跡荒荒已少功拈取五千言兩字  
姿年何物擾虛衷

題蔣蘇庵鳳臺弔夢圖

人事千萬端不過一俄頃若茲已歷劫墮地誰見省譬  
諸鳳臺鳳飛去不留影亦非真虛空正有空在井聞君  
了夢言扼要挈裘領身行孝與義舉凡暇以整築廬向  
邱旁鄰鐘發深警尋常一宿餘覺已日懸嶺清暉照堂  
顏圖畫寫光景回看城市間衆醉君獨醒

題鄭所南畫蘭

筆頭染淚與東風葉葉幽蘭泣露叢亦是當時三斗血  
十空寫作大無工

題左臺生所藏何子貞書胡文忠祠賜碑真跡今



祠石所刊乃子貞孫維樸所代書也

咸同寫碑手蟻叟最稱聖臨池弄小雛指歸付崙孟煥  
得伯施法固亦相逕庭安可代祖書真僞子能定正如  
狸骨方識者謂子敬此書實閎偉克狀勳德盛意惜戡  
變才身死功未竟得之不刻石吾爲胡氏病削殘郊祝  
版刮去槩几淨古今有同然一笑且姑聽

題劉未林臨潘弱水山水卷子

廿年市隱遂成翁一紙沈冥戶限中身世略同潘弱水  
可堪冰雪憶遼東

學晚吾慙百不如似君真可玉山居他年道是劉松老

却有坡翁一段書

爲陳彥通作鸞陂草堂圖並題之

爲君寫作草堂圖跌宕風煙略似無  
別夢繞陂情勝水  
戀人常在枕函隅

人間何樹可棲鸞  
半在洪崖半葛壇  
漫欲相師吾北苑  
筆頭換骨欠還丹

贈林夷倅同年

先生老有濟勝具  
每出奚奴囊好句  
看花郊寺歲不虛  
猶戀王都舊風趣  
髭齡對局餐菊齋  
賭墅功名早延譽  
爛柯今料成敗棋  
縮手寧爲少年助  
商量老學話先朝

身世放翁同際遇吾家匡廬君所愛況有手栽桃李樹  
漫山芝朮足養生賣宅何緣將券署聞君頗乏杖頭貲  
怪底南來約頻誤何妨一貨壤緼袍共我提壺聊薄醪



忍古樓詩卷十四

新建夏敬觀

壬申元日試筆

以下壬申

禁夜忽成曉烽邊天色蒼萬家休爆竹百氣助櫓槍試  
握書元筆沈思擇語祥緣何戰場側置我晚娛堂

上元夜和稚辛獨行靜安寺偶成

陸海鼇山夜不明試燈風裏未休兵照街寒月十分滿  
繞樹棲鳥一再驚飛矢豈容仍走驛劫棋還見久爭枰  
細思收拾無長策多恐仍須酒解醒

十八夜作

屋山夜夜結星球夷市從來不禁遊歲首竟教行路斷  
月邊惟有戰雲浮坐愁搨朽難摧敵東望連烽怯倚樓  
今夕貧家相對哭本無燈火那須收

梅臺小坐寫影題之

花中梅最有真操樹老花疏品更高塗染何容借脂粉  
損增那得妄分毫不愁作崇冰兼雪可愧貪春李與桃  
傍屋築臺安十本爲渠護惜敢辭勞

十九日和稚辛上元韻

閉門甘似囁嚅翁兒婦人言肯強同勢至爛焦誰得救  
計煩搜牢恐先窮夢餘蛾闌真投炤晴際鴉鳴故詔風

坐看月華流萬瓦外邊兵火徹天紅

過叔通雙漢鑿齋賞梅

高花插屋似雙姝芳氣微薰四座隅掘地悟生松下甕  
挂牆裝比石橋圖身藏藕孔寧蠲惱心有桃源或可逋  
呵護在人須不毀世間劫火亦區區

爲劉訢萬題公諸畫幀

雪壁冰縑一境收癡翁高思落滄洲遠峯隔岸煙初斂  
叢竹沿坡翠欲浮雲母屏開成六曲水精宮淨浴雙眸  
茅亭借得蒲團坐應悟前身是子猷

誦東野蒙籠楊柳館中有南風生之句聊寫其意



圖成似秦淮作詩題之

簾館前頭畫舫輕受風楊柳可憐生白頭夢見秦淮水  
霜入千林寫不成

廿一夜不寐書憤

野外雷轟風引長屋頭月上火飛光真無臥榻容安睡  
曾是驚弓久病創彼且役民塗耳目聖難醫世出膏肓  
魯連細黠何關事莫謂凡仍有不亡

廿七日書事

要駕真虞馬覆車攻堅吾軻敵乘瑕却愁小利難終勝  
一憤徒然破萬家

肉袒行成誠可羞越樓一日敢忘仇民非教養何堪戰  
敗與夫差坐未謀

書宋史韓侂冑傳

紹興勢豈異開禧侂冑愚奸遜會之蓋世功名寧易取  
敗謀莫漫咎西師

稼軒謀議豈非賢應變端須策萬全落拓詞場青兕相  
那知罪及美芹篇

書陳東傳

自古植羣誰壞散時衰士與臥碑仇刺心一讀陳東傳  
賢跡真難語末流

晚雪行

焦贛易林云早霜晚雪傷害禾稼二月七日日將下  
春大雪全集明日迫暮復雪飛颺空中與落日相映  
念兵凶未已災異乘之吾滋懼焉因作晚雪行

三旬苦兵初解圍逡巡未厭春光遲問知五戍當作社  
屋角乍見堆辛夷江南節候易暄煦二月宜卸隆冬衣  
昨日尚晴盱忽雪凍積寸白封融泥今夕斜陽未全斂  
街頭雪片重霏霏曦輪雖皎力何薄寒氣突勇如豬猡  
吾園雜植木失次將荷鋤鋤勤栽移杏殤櫻死救不得  
纓冠被髮徒奔波追憶壬子十月朔北固大雪連海湄



曹園草木尚濃綠一夕皓變鋪琉璃客居無裘禦倉猝  
對竈借燎起栗肌二十年來再乖候天象北應吾憂危  
豈能遮蓋戰血跡益厚疹厲增怨咨前年冬寒雪盈丈  
去夏湍急翻天池淹州沒縣及秋盡春回莫療千瘡痍  
座旁霆擊難掩耳毋亦臘月鳴瑞雷

爲王西神題其手書斯冰篆譜

行楷乖訛過八分許書功在二徐勤可憐頑伯多傷俗  
稍賴虛舟解整軍法式古如懸玉筍精能子更運神斤  
我慙拙劣同羅趙漫欲行間學瘦筯

三月十日舟過吳淞口

嚙岸潮回海未平江歧路轉入初程低飛鷗妒浪頭白  
遠颺蜂隨船尾行春草生從殘燒火水田鋪似敗棋枰  
苑風尚雜餘氛起爭奈諄芒不肯明

陝州

周召化行及江沱與汝墳於荆興屈賦在蜀起雄文本  
縱甘棠實疆留石柱分聊因過州日一述所知聞

過函谷關

穀函王氣死灰寒那謂秦關犯度難千里人家仍穴處  
一旬行旅辦風餐谷間梯種珠量麥城下車穿坂走丸  
避狄遷岐計非得古來陳跡不觀完

三月十四日宿玉泉院賦示同游林詠庵梁衆異

李次貢諸君

埃車奔馳如簸糠二十瞬卽里許強晡而就道景誠迫  
晶晃平射長河黃整躬憑軾面太華目精不動神翱翔  
兩亭翼然出巖腳其背矗立天宮牆轅止步上真靈堂  
洗滌塵垢玉泉旁急遣作飯充饑腸出翫峯頭明月光  
久坐山氣侵肌涼明朝困憊須隄防遂命四體安繩床  
請效希夷無待商

無憂樹

誰云此木可無憂身似枯籐挂癭瘤玉腕攀條曾幾度



道人得見著花不

王猛臺

違世人誰不見疏貴吾所學要深儲何當盡絕浮華士  
來傍臺前更讀書

道行未可薄符秦道晦名山且隱身並世桓溫心叵測  
座中捫蝨向何人

十五日自西谷入山歷十八盤抵青柯坪捨輿攀  
登千尺幢百丈崖老君犁溝及北峯止宿

太華視凡山立意矯雷同盤根一巨石上裂爲羣峯世  
眼驚造化喚作青芙蓉象物出自然豈必由鬼工曲說

務悠繆荒談恍高崇如此勢巉絕孰得磨以礪皮毛蛻  
之淨氣骨清而充承戴太始土潤澤千載松蔥鬱翻在  
頂髮直頭未童壁罅挂靈藥雜以桃緋紅玉女梳洗出  
亦愛春妝濃下臨深谿肆幽怪辭人蹤天泉日奔穿僅  
攀西谷通舍此便絕路除非解飛翀衆手爭一索銜貫  
類蚶蠓時遭下磴人憐讓喘息翁古來設鎗壇望祭柴  
燎中垂堂戒夸主未信能登封吾儕陟泰半敢曰德在  
躬擗嶺當足前色沮蛇脊穹退之與秋帆困悔寧吾恫  
止焉訴真宰冀憫詩道窮

十六日雨止北峯抵暮放晴登眺有作示承詩

益上下益難恆語非欺我試行擦耳崖却回驚失墮蒼  
龍突弓背上下尤坎坷今朝霧雨濛危滑更未妥李君  
雖告勇七躡差免跛令我能捨身追遊奚不可旣登莫  
復下棄家吾豈果王陽念遺體畏道乘險巨祖母方倚  
閨遠遊吾計左更思地下兄撫汝如螺贏善游非必徧  
境勝須耐坐滄然滿坑谷四望雲扃鎖是時北峯孤一  
寺層縣裏噫氣開闔之變化態良夥吾曹屈伸臂盡吐  
石蓮朵背撫青黃疇渭洛帶雙鞢黃河收其流奔赴急  
箭筈譬升南峯巔所見曾異麼飯餘清月上齒菡弄珠  
顆易地或不然無峯增婀娜



潼關

三河輻輳三州跨左望中條右瞻華桃林原野足膏腴  
牛馬猶堪力耕稼雄城作鎮氣蕭條秦後紛紛覩殘霸  
挾飈塵土起沸天儻拭干將牛斗下

洛陽

向讀伽藍名園記頗覺論都宜此地花時下車料春好  
但見桐花著林際道逢前導負弩蜂誰是朱門舊姚魏  
買花曾不得一枝安得對書求品貴龍門佛龕半剝損  
數間破屋香山寺惟有伊流沒脛深兩崖之間貯清氣  
河臣餘習載食疏得鯉庖能爲美鱸晚來投飯獲一啖

差擬符郎辨鹽味古言宰國如宰肉倘似老夫鋪酸累  
二周餘斃孰當憂鼓腹熙熙吾輩事

香山寺

饋金標榜等虛縻俗士誰諳佛地施惟有樂天真善用  
不慙元氏謝文貲

人事危如八節灘誰能疏鑿使常安白家功德雖圓滿  
祇放門前數步寬

商丘車中調衆異

梁子學陳搏自云喻深旨夢中苦哦詩竊謂搏不爾昨  
轡過宋城子睡雖甚美孰如漆園蝶蘧蘧化爲己子常

恃黃嬾搏則得周理

北游還抵滬寓書示同遊諸君

北游決意叩秦關正慮時危命歟難幾輩作昏能恃阻  
吾曹行樂亦偷安霸才世久無王猛畫本今因識范寬  
歸告北堂應轉喜癡兒腰腳未蹢躅

挽龍毅甫

嘔心曾勸止詩篇病榻須能學上禪謝客生惟多慧業  
龔生死竟天天年觀蕉豈是中無實求艾終教疾莫蠲  
酒畔覆杯凶問至漬縣知不及重泉

挽諸真長



平生筆札精聊博祿升斗蹉跎三十年世換身不偶積  
金散書棚一塵老初有焚巢竟殃及貧廡傭糊口家傳  
慮單寒舉子傷不壽作詩曾慰子務德必昌後晚生符  
我語兒女果八九阿龍就塾時憐渠啼面垢今雖及父  
肩能辦衣食否子死無所遺接孤衆何守從來貧士妻  
要甘任井臼王庵雖自佳譬之石田畝昨朝殯且葬賴  
得巨卿友雨中一封樹安宅庶長久

爲龍榆生作上彊邨授研圖題其後

使車歸自越王臺伴壓輕裝此研材一石爛柯枯盡劫  
卅年點筆淨無埃丹黃事業由親授魂夢衣冠豈待來

正有千巖遺譜在新傳須是審音才

挽劉潛樓

時至身已亡豈子獨無命追論丁年事悠悠付苛評我  
聞病牀語是非得其正使游盜錯間或冀傾耳聽北行  
詎入囊誠慮秦師輕奈何棖棟新遽感黍離詠吾鄉當  
光宣二十力諫諍激唐疏鋤奸未死手自訂子刃齒朽  
腐言出世畏敬盍持經進稿編與奏記并平生多負諾  
餉子缺盤釘歿而薦酒羞寧復存食性

鶴亭自羅浮歸分餉荔支曹白魚女兒香賦此答

謝

隱之帥廣南佐食乾魚耳一朝魚剔骨遂黜帳下士婦  
劉齎沈香去投湖亭水越嶺不喪清飲貪節寧毀君游  
羅浮歸未是仕宦比壓裝取粵物何嫌滿筐筐南食困  
腥臊性怯下刀七俗飽蚌蛇肥亦腊孔雀勝獫狁所拾  
實八九名甚詭形惡具人面味穢類羊矢君今有分餉  
何嘗取於此曹白固佳鮓荔支尤俊美勝以東莞香品  
與沈簪似割自女手纖貴難求諸市飯罷焚一鑪薰習  
讀書几因之誦君詩恍夢羅浮峙浮肌與羅骨蘊茲寸  
積叅芬芳微散襲正入君詩髓

贈別李次貢赴新嘉坡



鄭州初覲面邂逅一傾談既別官居北重逢道復南留  
連紅後好橄欖澀中甘看取詩囊滿平收海嶼嵐  
作詩雖甚晚力起逐高韋常挾風霜至肯教珠玉圍移  
床臨海屋有宅寄都畿南斗望成北念君何所依

爲鄭韶覺題歲寒三友圖

守待春從冰雪生幾曾敗却歲寒盟講堂階下勤培種  
桃李相依要老成

自題伊闕圖

鸞川北流出伊闕兩山相對殊突兀達聰暢化古王都  
東通大河勢蓬勃來桑柘無一株地力似隨靈繹歇

魏齊隋唐跡安在惟剩破殘十萬佛筠廊所記已如此  
氈蠟幾堪重拭拂

題吳湖帆夫婦臨趙松雪管仲姬碧浪湖竹卷子

衍譜雖非出仲姬趙家墨竹有餘師

佩文齋書畫譜載李衍墨竹譜陶南

邨說郭作管道昇撰今明鈔本說郭無

四歐堂上重臨寫飛玉流煙又一

時

從來梅與竹爲鄰梅外須添竹喜神

湖帆家有宋刊梅花喜神譜爲其夫

人畫物

金錯刀如鐵鈎鎖晴篁脫出錦綳新

汪憬吾寄示羅浮蝶詩兼道寓廬藏書爲淫霖漂

散詩中一再惋惜慨歎賦和奉慰

我我朱明啟陽宮雞鳴海日光瞳矐壞衣幻化尺蠖繭  
長養遺棄丹砂中我聞二枚致君所七日蛻出翔飛空  
娟娟彩袂戲書幔爲君勸酒殊從容人間何地避洪猛  
螫膚况有如壺蜂琅環散佚誠足惜慰君疑與脈望通  
洞天方索走失蹤去去儻謝耽經翁道書不似儒書窮  
璿房可畢藏山功

題陳吉士超山遺愛圖

唐棲萬戶魚稻鄉越梅結子青滿岡林間錯雜衆果豔  
杙子火赤盧橘黃從來富給資水利鑿河不僅通千櫓  
五林江漲一衣帶波路滋蔓生菰蔣陳侯胼胝率縣卒



一日疏濬夷其荒自茲百穀充庾倉復有果隋盈篚筐  
縣民祀侯猶不忘比以斛土成錢塘

論畫絕句

書家墨戲可通禪奇逸中間要取妍意出復堂南阜外  
無過秋岳七薌賢

爲龔禮南題其先德含真翁仿古畫冊

筆盡意常在咫尺類尋丈風流緬先輩塵外一鶴擎精  
廬結烏石臥聽泉松響逸趣來毫端古心契無爽煙雲  
吾過眼往往經鑑賞揣此十二幀置案手臨仿有孫能  
洛誦抱之示吾黨還祝收散遺祖物入珊瑚網

吳敬臣

茂節

出示其師梁文忠題贈俞竹蓀畫梅

扇俞扇爲敬臣寫適與吳君同字也

食魚齋畔舊梅叢手植而今剪伐空一扇能珍題贈意  
數枝未改耐寒衷似令且字同元歎正爾清裁出仲弓  
心跡廿年冰雪瑩重逢垂涕道吳中

爲杜綬臣題其舅氏所遺外祖書卷

乾嘉董體最風行參透書禪始中程正爾昇平端習尚  
試看廉吏立功名顏流何限今輕古遺墨相承舅付甥  
寶子家雞好臨寫不同兩把老蔓菁

題癸酉歲朝圖

以下癸酉

雞鳴震方白春物遂昌昌萬象感和煦初祺肇千祥妍  
花著梅枝松柏閒青蒼山茶凋紅玉水僊暈嬌黃條風  
扇羣卉聿在君子堂

贈王莪生

世方重多金仕宦類行賈君賈似郎潛翻被文書苦何  
物能宛衣宣南舊塵土回頭卅年事零亂挂肺腑獻瑑  
意雖殷孔休肯臣莽腹便藏典記謇謇寧盡吐高君善  
戲謔贈言作閩語滿座一軒渠亦佑壽觴舉每當會食  
時來何態踴躍意從華胥回攜有新睡譜看君食肉相  
下箸氣如虎定挈同牢人鼎養饜肥羜



爲黃藹農作蔗香館圖題之

庭外青山舊姓黃  
黃家且鍊蔗爲霜  
含飴慈母將孫弄  
此蔗如萱樹北堂

十日立春

已換年名十日強  
艱難天意放春光  
笛聲匝市偏妨睡  
鳥語依簷欲引吭  
漠漠林端籠霧薄  
斜斜雨脚趁風狂  
樓闌坐閱蕭條氣  
老味留人取次嘗

持所做朱澤民松壑圖題贈陳仲恕

伏廬胸中竹色真  
平生不染纖垢塵  
當怒翻用喜氣寫  
衆卉搖落竹獨春  
筆耕所穫療癖疾  
變化古舊爲鮮新

南歸將看雁蕩瀑儻就澗口揮以斤圭璋之質世不用  
正類怪石泉垂紳千金一个愧莫辨貌此松壑聊贈君  
題李釋戡握蘭移裁曲圖

閒續燕蘭紀國香策勳九畹等旂常合持明達新聲譜  
收入元成舊樂章盾墨共誰頒露布樓楣從古有霓裳  
廿年袖手消英氣祇在煙鬟霧鬢旁

二月十五日作

已過花朝柳未青雨穿雪霰晝冥冥日車不送陽和至  
遮莫中間隔水星

有感

有感從來響必應播空波電散還凝座旁咫尺通寰宇  
相照心光數點鐙

夜起聞羅馬鐘聲

道少喧阗闌閉關鐘聲一動徹人寰空齋起向東闌望  
燈塔參差在屋山

擬子夜歌十一首

儂歡各天涯莫道別離苦雖云不相見朝朝帖耳語  
思歡隔歡面情不絕如線儂唇帖歡耳聞聲不相見  
歡有手攜鏡照儂雙頰朱却道綺羅色不如玉肌膚  
願歡爲畫工爲儂寫腰身儂當謝羅綺爲歡小橫陳



寄歡一曲歌歷歷珠走盤隨歡腸輪轉一轉千百旋  
歡球與儂球如梭擲來往何物著中心分明結情網  
共歡翔空游共歡潛水居翔有比翼鳥潛有比目魚  
著儂浴時衣共歡海濱浴試效雙鴛鴦交頸沙頭宿  
歡來持香花比似歡氣息歡卽安琪兒夜來生羽翼  
一機牽衆車不如駛一船卽情比鞦韆儂是卽所專  
情如油揮散燕之輪自動共卽馳一車卽迎復卽送

題沈子培海日樓圖

鶴翼翔八表塵海一回矚憶我東鄰翁倚闌對朝旭隔  
籬聞嘯歌分蔭大槐綠槐間竄修籐接翁樓後木翁當

霧晨際指示萬鱗屋小坐餐沆瀣斯須覩暘谷爲翁圖  
所居人境一樓矗逝矣行復念此狀猶在目

題韓退之寄襄陽于相公書後

文字從來要慎投名高下筆卽千秋至人心縱無清濁  
却恐圓機誤未流

梁<sup>與</sup>共出示先德蒞林中丞石印二鈕云久散失  
其<sup>其</sup>叫龔君懷熙購自市間卽以歸之作長句紀  
其事並拓印徵題因和一篇

中丞金印大如斗不如私印傳之久

辛亥之變蘇撫君  
印已遭焚棄

師買得贈與君祖印傳孫假師手田黃貴重值兼金雖

產君鄉近希有昔人篆刻估磨滅名姓幾人能不朽惟  
聞天籟今尚完作質常鈐書畫首君之先祖精鑒藏置  
印市嘗逢八九意存餘印匿人間此獲珠還數良偶我  
昨過君爰居閣摩挲贊歎雙瓊玖一石誌官質稱凍一  
石鐫名工製鈕視君几上十數枚溫潤無如茲德厚宅  
家賜語及子孫四字恩逾書福壽君能忍事且論兵惜  
未腰間懸祖綬

李拔可席上賦答許疑庵同年

坐中接春杯半是白頭侶於君雖初面文字早心許舊  
國怵履霜夷禍胎甲午中更百千變亂取亡可悔吾曹



同時命窮達一炊黍相逢成隔世  
賸把詩癡數君家天都下我家匡君所有山今莫歸君差樂鄉土君詩固有  
助巖岫對庭宇我才老且盡不得戚何補

子言年七十矣爲繪皖雅移圖題句爲壽

六十成詩雋七十成皖雅獨於文獻勤誰似吾子者平生澹泊懷無意方魏野白首一貞士詩名滿天下相交  
卅四年談往付宜樹過子著書移聊爲子圖寫昨巖作食邑酌溪引芳罍祝子手植林參天由拱把

答陳丹初人日見懷

南州涉七物華新解和閒謳得幾人及我郵筒春已老

花前憶子苦吟身

列嶼環窗海到門書堂喚起古騷魂鄉詩正有心鐙在  
須遣生徒識後村

哭王搏沙

忽得子凶問痛淚奪吾眵擦撥久燭忿鬱起掛中腸助  
子力所興膽汁昔共嘗五年在海濱驚濤撼書堂吾言  
釋猜忌忠敏猶受匡易世病諸魔學子涕蜩蟪屢成亦  
屢壞存亦罹百創今日共摧毀已矣同國殤去年子南  
來過我舉一觴期我振臂起我固善刀藏精鋼不可折  
子意殊激昂別去顚誰何黔突似未遑不謂一面終棄

我如張黃

謂俊生  
真存

後死詎有責吾老世相忘

連日子言偕張燕昌劉錫之見過賞牡丹子言錫

之有詩書此答和

君攜二客款林扉接座連朝玉屑霏澹日尚能供醞籍  
小風時與布芬菲荼蘼殿後彌傷晚蛟蝶爭先漫合圍  
九十韶光看欲盡花王意似阻春歸

漫道此花惟北勝水邊竹裏認移根春遲自爲年當閏  
風虐寧忘舊有恩丹白在胸徒惘惘塵沙得路總昏昏  
微憐投分殊蘭茝難挹天香起屈魂

爲吳敬臣題劉琬畫卷



吳君示我一卷畫謂是元代我曰非劉瑊名不見記載  
如此能手史見遺細看絹色頗陳舊紋麤眼扁真圓絲  
越嚮空青取石綠南海蟻卵研粉脂鬱摸重采不退減  
選質鍊製遵前規有清入主雖改製鹵簿沿用金龍旗  
文臣侍從服袍褂武將帶甲仍頭盔朱纓覆帽無頂石  
揣此狀態初康熙南陵徐氏好古者問之家有精花瓷  
雙環畫底王府式曙光堂字工楷題提行示敬寫楹額  
賓客禮對尊爵宜山川氣象殊北土差是扈蹕南巡時  
作圖乃在府堂左大抵還至京邸爲我題此詩釋君疑  
君視此軸毋等夷國初畫本世已希試數今能辦者誰

書天津張士瀛母曹太君傳後

婦人成家道至德在幾微非有出閫言一念卽博施張  
君走南北所布皆母慈起死上其籍勝得甘旨歸母懷  
有衽席出國自阼危春草蔽幽宮寸心及邊郵爲善山  
九仞寧肯一簣虧揣念誓墓言後當書穹碑

題黃劬厂墨謔廬畫隱圖

明季諸畫家易代每高蹈漁山南田輩尤難是年少子  
生庚子歲命蹇丁未造甘心事筆耕比跡同二妙文章  
已驚世身若南山豹沈冥向縑楮落筆益荒峭愁寫破  
河山無地可樵釣俗眼重摸色墨蹤匪其樂繪成遣持

去降格徇時好驚栗固有餘換來供鶴料有廩顏墨謔  
以墨潤脣燥儻如石子專玩世寓譏誚子旁無給侍或  
圖所悅貌慎莫效虎頭刺心謔斯暴吾今學箝口對客  
鋒韜鞘未曾喻墨謔惡聲吾不報願子亦蠲謔惟以墨  
自勞謔非俗針砭俗痼不堪療

題王廣陵集

寒灰撥火見真儒相賞寧爲屈宋徒聖處文章契騷雅  
尋常索得解人無  
豈同凡草溷泥塵一葉靈芝出朽薪厚者不培天意嗇  
古來多負倚楹人



爲徐積餘題所藏周稚圭山水冊子

詞人兼繪事畫人兼倚聲二者難並著惟以所擅鳴大  
鶴畫希有晚尤慵筆耕乙庵雖作畫畫畢不署名二子  
出餘技肯與諸史爭此冊傳稚圭名不列畫評世稱其  
詞耳孰謂工丹青瓣香李重光同是七夕生稚圭所自  
詡醉舞採麗情畫勝不增重畫遜不爲輕罕見即可貴  
盍取詞翰并

爲湯定之題其先德貞愍公遺像

凜然毛骨妙傳神岳色崔巍照異人試就畫圖論相法  
不成功業卒成仁

倪黃而後有倪黃翁更齊名戴鹿床節概豈因文藝重  
卽論文藝亦堂堂

暑夜不寐

桃笙八尺尋涼徧竹枕四方頻轉換曹騰入夢却驚回  
手倦難拋蕉葉扇老年畏熱勝少年廣榻獨眠猶欠便  
生憎太盛願逢衰自信身非蒲柳賤

秋晚園居卽事

秋霜顏色似青鉛染着丹黃樹轉妍排闥無山雲補缺  
層層疊在夕陽邊

孤松百尺出林間俯視東流彎復彎朔雁飛來報霜信

江南一角惜殘山

寫白石岩僧題之

道是清涼熱可憎  
牯牛背上集蒼蠅  
塵中閉戶吾何似  
白石岩頭苦行僧

爲賀天健題其室人遺畫

埋骨青山似畫中  
壟前松色碧蔥蔥  
知君臥聽南窗雨  
腸斷方回半死桐

九日變風社諸子招飲市樓

海隅雖無山騁望  
亦適性何須問  
霽雨秋氣嚴且正  
有如詩變風中不  
淆衛鄭秋吟出  
秋士粲粲黃花靚  
諸君



樂茲日招我設盤飮不嫌老馬慵謂是識塗徑酒行示  
詩歌次第許題評一一落我手目炫瓊瑤瑩市樓耽吟  
聲縱莫回俗聽要是吾儕言文字我爲政座間鶴柴老  
風雅克刪定微哦共欣賞舉盞屬中聖我衰不解飲醉  
倒扶誰倩歸來述此篇語倘非逕庭

重九南京諸友登清涼山掃葉樓作登高會先日  
折柬見招道遠不赴分韵得噓字

愛山翻結瀕海廬欲出甚恐母倚閭開函省識又重九  
破屐不蠟一載餘清涼山樓舊登覽敗葉滿徑松風噓  
想當是日僧淨地寺門擁篲迎高車我惟閉戶康橋居

日掃落葉從故書

題吳湖帆仿元四家合卷

僧袍百衲是耶非  
妙諦圓機悟者稀  
要識頭陀精進處  
都從董巨得傳衣

爲吳敬臣題梁節庵牋扇集冊

節庵身世冬郎近  
一世歌詩吐忠藎  
存題紈素滿囊中  
歿待搜羅出灰燼  
抗言遭放曰沽直  
毀草不傳知有恨  
晚雖進用日已傾  
無力揮戈回尺寸  
吳侯重師寶遺墨  
五牋五扇比瑜瑾  
我喜從君得逸詩  
貞心苦意留芳韻  
爲馮超然題所摹柳如是像

玉楮霜毫極意傳風花煙月墮愁邊墨痕微染脂痕淺  
恰是明漪照影憐

病榻爲題入道詩牧齋絕筆已康熙橫波誤寫誠何意  
莫是深銜故國悲

輓熊葆新

北璜

昔從吾兄遊惟子交最篤勵節及孤嫠遺嬰勤保育憂  
心懷飢溺勞瘁過濡足子家水井頭蒲團座常肅進勇  
退彌靜學實兼王陸邇來念茲境年逝若馳轂夢尋吾  
家池苔砌迷往躅吾兄久泉下昨子又不祿因子觸舊  
悲傷哉草俱宿



題陳佩珩丈紀游圖

少年躍馬老矍鑠  
刷夜燕秦孰羈縛  
駛船如馬吳越間  
長楫又因風利泊  
平生日歷付丹青  
息翼一樓比歸鶴  
繪作桃源昔贈我心知從翁固不惡  
而今山好不得住  
此境惟能畫中著  
眼看人世塵漠漠  
未溷胸間淨丘壑  
朱顏且進深杯杓  
何須苓朮尋常藥

有感

衰時忠蓋可憐生  
亂世才華總不平  
腕底莫銷殘霸氣  
吟邊誰帶好春聲

除夕書懷

閏年殘臘卽春頭不覺駸駸一歲休身及老來彌耐坐  
世非今日始言愁哦詩聊用題吾畫沽酒還當酌此樓  
試謝物該和緒使自開重閨與天游

忍古樓詩卷十五

新建夏敬觀

甲戌元日出遊書所見

以下甲戌

老年逢歲旦稍入少年羣祇覺春無俚曾非我所聞  
草裙團舞雪銀幕度歌雲莫謂牛鄰叟能酬忍古勤

吾生值斯世凡百異先民盈衍賈彌病豐穰農轉貧  
瓶花雜海卉盤果飮蠻春上溯書元史其言總敝陳

江左夫人出示花卉冊子夫人先室左淑人兄劬  
孫太守之配也淑人與劬孫下世均二十餘年  
矣感喟書此



廿三年逝若頽波舊笥塵封罨畫羅今覩花枝在東絹  
還因崔嫂憶沙哥

寫生絕似椒花館未讓毘陵惲紉蘭應把仙桃共尸祝  
遺黎不忘舊州官

題贈謝玉岑畫扇

江山寥寂甚誰與話叢殘一瞬成心史孤亭閱歲寒竹  
光閒了了松意對盤桓小坐呼吾友煙嵐靜裏看

贈常熟龐士龍

使鐵能如腕使毫書家治印藝尤高親傳筆法由阿父  
精絕何殊傅壽毛

爲陳庸庵丈繪重游泮水圖題之

廟堂棖桷舊崔嵬  
回溯當年釋菜來  
山聳鳳皇輝一郡  
堂瞻蛇蠃兆三台  
伯饒世號爲曾子  
君實人呼作秀才  
強握禿毫摸掌色  
難傳氣韻在風裁

題沈信卿同年補髯圖

二十三年如轉燭  
吾曹鬢髮各髭髯  
飛書草檄平生意  
抵几而談一奮髯

懃然游與物初同  
頰上添毫卽似翁  
着面常丹惟旨酒  
吹髭不黑奈東風

爲洪荆山題岬夢圖

子於葩詩真有獲念母尚恩夢猶昨心如寸草報春暉  
安得山頭常濯濯毛詩曰杞魯曰岐茲滋之義殊瓠落  
錦綳脫去兒筍長慈竹青青俱解籜其他茗發穎豎者  
何一本根不附着子前要我題子圖爲母求言意非薄  
未遑訪我蓬蒿間儻亦行役苦牽縛昨因楔日復遇子  
座上殷勤勸杯酌從來禮數重酬酢聊爲引詩道其略  
爲吳湖帆題其先德憲齋尚書臨奚蒙泉戴鹿床

西湖圖卷

移取湖山入墨痕偶招奚戴兩精魂是中仍有家雞在  
法乳今傳洛誦孫



園遊絕句

網巾水上小帆船  
片片隨風落那邊  
花鴨狎人渾不避  
兩趺如槩突追前

草茵剪似髮般平  
園藝栽如錦樣明  
斜度初鶯分穉柳  
低翻小蝶亂飛英

鳥瞰山河已不全  
羣槎飛刺四游天  
小兒欲與爭高下  
一線乘風試紙鳶

上巳日南京諸友約玄武湖修楔不赴分韻得春  
字

市樓吟社及芳辰  
還憶南都淡沲春  
垂柳舞風金作縷

飛花著地錦爲茵夢程久覺奔馳倦文會空煩走召頻  
却道被懷惟酒可平生杯酌怕沾脣

題汪精衛秋庭晨課圖

握筆慈母旁養正自童幼誰能几後掣敏腕早成就觀  
君庭課圖秋爽開宇宙出簷拒霜杲篆壁虬籐秀當前  
母色喜聞君聲諷籀追慕過隙歡夢寐常覲覲一圖視  
杯棬奚異青氈舊堂堂述德篇真氣浹膚腠論交先輩  
篤長公會邂逅閉門居海南著述娛老壽邇來頻書問  
於我有勤懋我方事親年求艾謁醫灸覽圖切觀感陟  
屺內彌疚君今衆所望變急手難袖道在具具興安輿

斯止寇牆高懼基下國本可深究缶器喻母腹羣兒說  
方謬持茲教天下民德庶歸厚

次韻答范彥殊兼示李生融之

我今感春與秋同桃李浪笑霜鬢翁君今門牆列子弟  
變化莫測如蛇龍平生意氣雖並減我面已皺君酡紅  
李生溫溫一年少綽若玉樹臨春風於文見道學知本  
豈必更效寒號蟲曩時謁我以文費其居却在夷市東  
幽蘭芳烈必擇地儻亦入君儲藥籠

爲胡伯宣題李梅生洛神圖

相較東村及竹西所師難與十洲齊絲丹縷素非容易



小可臨摹入品題

王奉常集載有跋文衡山書洛神賦仇十洲繪圖合卷

文章異手是耶非畫意能工世亦希  
灩灩江波爲濯色  
應圖寧是衛文衣

任心白將住持虞山蓮花庵書此贈之

識君廿年前稔君亦誠夙相攜事府主惟君最忠篤老  
歸居士林食久斷魚肉雖仍作書傭腰石日春穀前曾  
秣陵去收取羣嬰育竊聞名子任衆念君所淑博施聖  
猶病匍匐就饘粥昨日來語我謂將長休沐舅家有茅  
庵結在虞山麓持茲般若心終焉此幽築平生積憂端  
如綸抽蠶腹餘年急逃禪吾日苦不足羨君志能果擺

脫萬塵俗門前一堆山堂下琴川綠有鐘可報飯有經  
可遮目吾詩君補壁切莫碧紗覆

題陳甘移睇嚮齋授經圖

君家池館我未到補石補林憑意造畫成君謂頗似之  
闌檻依稀昔吟眺圖中侍立孺子色辦髮垂垂頭不帽  
六經爛熟在胸中不假浮辭相炫耀嘗聞馬援戒兄子  
類鶩類狗擇所效禮法誠難拘大族弋名稱閥或欺冒  
君今作文記此圖若班敘傳崇典要復憂世變及堂構  
折棟崩榱甚於盜我知君意重此圖父子傳神八九肖  
君今四十面已鬚試看圖中猶玉貌紛紛喬木隨燹燼

君廬不存斯意料祝君生子令世守更讀遺經尊祖詔  
爲方重審題其先德明檢討密之先生畫幀

平等閣中無可竹孤根迸自龍眠麓今從君齋觀二幀  
草草江山氣清淑一幀自題甲申夏思陵已殉社旋屋  
一幀仿米亦書名尚未捨家換僧服二畫正是中年筆  
意境能生生又熟眉樓歌紀魏血書痛念膝行雪冤獄  
當時朋黨禍誠烈神寶淪亡手反覆先生名列四公子  
跡異侯陳節尤獨匡廬削髮遂終匿浮山青原一盂粥  
次公田伯更不仕子弟猶然恥周粟先生遺畫今希絕  
况此完完神韻足君其善寶免蟬蠹更買仲賢禪藻軸



立秋前一日自都城餐廳歸作苦熱行

廣堂冷氣收炎暑坐久吾忘日方午出門一步等庖廚  
安得長居茲洞府我家園地日尤烈偃息閉窗抑何補  
今年熱勢一再厲梅黃時已旱無雨明朝白帝受代來  
赤帝啾啾猶莫許人生苦熱甚苦寒物力奢豪利難溥  
貧家對竈可回溫富家始得盤冰貯人爲巧思構冰室  
試問幾家能辦取街頭入夜萬人夢惟盼一涼天賜與  
續苦熱行

秋陽肆虐勢復驕地車載我東奔逃目遊遂及衆星所  
得風如水回枯焦繩牀一夢日又出還置本處相煎熬

浴勤不滌汗垢淨體輕漸覺肌肉銷地行晝遲夜何速  
苦盼到夜愁來朝

園居雜感

蟬抱高枝日麗空苦嘶偏爲柳無風也應日盼生秋早  
甘死嚴霜肅殺中

雨點疏疏陌路旁何曾一滴過園牆樹頭六月挂黃葉  
殞汝分明不是霜

初栽拱把患稀疏買樹頻添手自鋤今日成林轉嫌密  
任他生滅忍芟除

新柳垂池半蓋荷門前老柳已婆娑十年學團真彈指

學宦光陰始悔多

爲盧冀野題飲虹移填詞圖

偷蜜增醒村醉回玉川健倒在莓苔蒲江詞句疏齋曲  
兼并君家幾輩才

凌躍超驤有不禁座中說喫孰知音譜成換取錢沽酒  
飲釜如虹涸吐金

贈蕭厓泉

秋萼畫似蓬樵好童時窺見一鱗爪蕭君入室更過之  
墨痕點綴瀟湘曉江南三載識君面每覩畫圖輒傾倒  
筆端生怪意出塵繪境傳薪自張璪北居更得世人重



百金買販扶桑島黛疑粉散絹素間衆史求爲移寫稿  
邇來賃廡甌脫地安硯小窗殊草草踵門又使鐵限穿  
能事何容促迫惱從來畫師多壽考七十後作人更寶  
君今七十不衰老下筆江山氣常浩

山陰沈翰字詠孫  
又字秋尊工畫名

不出湖  
南北

### 贈沈季宣

與君同官識君賢拔薤伐棘歷百艱狡謀助亂卒止遏  
計小挺緩相回旋我留學省君決去除惡未盡常悁悁  
後生迷惘誤曲說心意飄涌兼風泉俄聞鳩毒數十輩  
我早去官無寸權若曹終自蹈非命非君與我能矜全

回頭歲月驚逝川茲事修已十五年歸來熟讀逍遙篇  
看君起舞真飛仙昨者病渴如文園采參掘芪煩湯煎  
鍛鍊體魄金石堅日能健啖宵鼾眠

爲任瑾存繪小東湖圖題之

東明古東郡地近宣房堰負薪墮竹林迹在水維緩咸  
同河忽溢漂害越城坂及今縣衙後積水常坎滿任侯  
政敏樹浚淪功克蕺收潦亦救涸居者吸且澣荷柳蔭  
魚蝦廢地獲豐產侯在民與樂侯去民勿翦錫名小東  
湖稍稍具亭館桐鄉雖云好邦國仍繾綣亦懸仲舉榻  
將爲徐孺展我知侯用心正使邑士勉

輓周印昆

詩功杜骨髓於律樹長城亦下聽猿淚寧求附驥名往  
勞虛己問爲語徇人輕舉世存郭郭君知實者榮

平昔幽憂甚端能戒起居取精依食譜却病守方書老  
比南山豹年非官道樗淒然展遺卷疑是楚騷餘

莊呂塵偕方雪江過訪不遇是日霖雨吾園已在

澤國中矣呂塵詩來道意賦此答之

誰能訪我犯泥水呂塵雪江二佳士我非避客適他住  
未料君來失延企平生居不擇高原礎潤綢繆智慙蟻  
黃梅時旱秋苦霖天意待吾亦該詭初來鄰有一頃波



桃李行栽差自喜填淵塞澮小塗殆療甚常遭沒門軌  
全家已慣住船官不釣不耕江海涖二君乍見訝景奇  
曷徙牛鄰且同止不觀潮至如鼻吸倒蹙川流上夷市  
相安甌脫等窪居稍遠塵囂賴有此

斜橋晚望

斜橋西望沒斜陽林際燈竿電吐光亂旋歸鴉棲乍定  
參差箏雁十三行

爲林山腹題南河修楔圖山腹自蜀來於衆異座  
間相見遂有投贈之詩卽以和之

文章比鍼芥未見已知名投句成初面披圖感舊京世

非能被襖事久屬承平翻幸相逢日緣君避叟兵

題梁衆異爰居閣詩夢圖

坐穿木榻苦吟詩樓外潮來繫夢思廬寄黑焦能迹遠  
杯斟碧海總言厄蔡邕避怨精心在杜牧談兵卷舌馳  
一語道君圖畫意此生何待問龜著

題邵翼如張墨君夫婦偕隱圖

往在江船接談塵示我吟箋高尺許我時倉猝無紙墨  
一字未報良媿阻筆陣堂堂天馬賦伴以錦繡迴文譜  
鎖闥分隔內外簾願喚詩成知貢舉邇來復出偕隱圖  
鈎勒衣冠猶類古金門大隱比方朔割炙何如割名與

買山而隱真大愚我戲廣君平等語天親雖曰世世婚  
佛性何曾有男女

癡槎重泛圖湯定之所繪衆異爲其甥壻索題

平生畏作渡海人圖曰泛槎命題尾驚濤駭浪忽到眼  
細看宛如張位水方壺圓嶠豈有根羣聖失居寧得已  
從容笑問將安歸我舸往還竟彈指梁侯手題廿八字  
喻以談龍意該詭好詩着句不在多持語鶴亭應唯唯  
曹纓衡招赴豁蒙樓作登高之會不赴分韻得有

字

卜居滄海濱偃蹇十重九樓高地卑下登陟意每負遠



招迹雖阻分韻及衰朽因憶卅年前南埭屢攜酒江山  
入殘夢拂拭我何有榜楫出杜句豪矣南皮叟豈真豁  
蒙蔽齷齪窺戶牖憑高視吾輩成敗莫假手衆中孟參  
軍識者今誰某

寄懷冒鶴亭海南兼答胡展堂見示之什

江南喜君別海南喜君至聚散各異情繾綣見文字胡  
君示詩篇動我懷君思十旬懶出門豈果無氣類微君  
相遮邀朋友如我棄君去良寡歡君來誠好事料知海  
南友正復同此意胡詩效宛陵堂堂張吾幟甘回鴨脚  
子俊壓荔支味

題鄒方魯畫

畫派爭分南北宗  
畫禪漫欲鬪機鋒  
節霞父子能兼取  
真箇溪山入墨蹤

題潘若海極樂寺看海棠詩卷琴南寫圖

廿年隨急景  
夢想故都春  
賸有招提境  
都成寂寞濱  
吟邊少朝士  
花底屬殘人  
重念吾亡友  
開圖一愴神

題潘若海手書詞卷其子叔璣其璣持來並投長篇

一語軍符出連州  
動義兵孔休寧  
受賈翟義竟埋名  
絕筆看仍在悲歌  
吐不平持來伴詩札  
喜聽鳳雛聲

輓黃晦聞

漠漠蒹葭澹澹霜歛襟一暝更何鄉生前語淺饒深意  
詩律精能入晚唐

臘雪斟杯照鬢班低徊夢境一追還歲寒詩卷松壇側  
擬辦齋筵耐后山

贈陳蔗卿

平生邴根矩相識在郎潛因善符斯道稱賢衆所僉忠  
謀難見納國運竟從占去去吾先汝回思歲月淹

疊韻答胡展堂述梅之什

以下乙亥

論詩得平情抉擇斯獨至君語挾秋霜孰能易一字杜



須伐皮毛韓莫文淺思哺糟遺其醇正恐乾嘉類宛陵  
亦師古曾不杜韓棄尤於香山真斟酌盡能事成功在  
有己豈望滿人意奚假一家言硜硜樹標幟君語固我  
同茹古取兼味

三疊韻寄展堂論詩

古人骨已朽徒古未爲至言須今日言字爲古人字古  
人倘生今所見入吟思豈甘啜塵羹滿紙陳迹類晉唐  
譯佛書文雅世無棄字樣必頒行廟堂慎其事曹衛寫  
人物亦取康僧意持比武梁刻堂堂立新幟吾言願質  
君儻非獨嗜味

四疊韻寄鶴亭

別君纔幾日倏已告春至念君苦吟哦閉門勤煑字粵  
南生長地豈必動鄉思著書誌風土草木窮狀類搜羅  
游宦詩慎勿誠齋棄詩中諸逕名考古宜有事昔君遊  
羅浮篇篇達茲意置君誠齋座勇登當拔幟吾非阿鄉  
詩餉君虀鹽味

二月十八日至南京諸友見招浣花樓小飲賦此  
報謝

數年不躋秣林春來就吟朋意倍親百罰難辭辜宿約  
一杯無異及良辰江山入座多情甚樓館當衢舉目新

重念茗寮羣策罷夢尋闌角墜花茵

纓衡釋戡醇士同遊郊外觀雪後桃花過靈谷寺

不入

挈我郊遊一走車路桃隨處布緋霞定知春雪多溫意  
幻作寒林吐艷葩峯頂曉猶餘璀璨枝頭晚未褪些些  
何須更叩禪關問聖解如斯儻不差

過譚組安墓

今來視此邈山河生死交情一再過有數文章如散霧  
無涯歲月亦流波吟聲入地應成淚物色當前漫可歌  
墓外園亭餘寸風花還與飾陂陀



徐丹甫齋中盆植五加山荷葉各一本云自黃山  
采得昨年以五加相贈移植園中春來茁葉青  
翠可玩賦詩報謝

昨歲君持贈春生老瓦盆五花已叢茁九臼想高擇煮  
石金鹽細研砂玉液溫者般培養易端賴舊澆根

陳石遺壽八十以畫鄧尉柏樹贈之

經師轅固生詩人韋應物君兼二者長過之壽可必贈  
君柏因柏有脂溢皮骨鍊服齒加強還能返玄髮此柏  
在深山蒼翠歲叢茁及見乾嘉儒無他養生術耽經且  
耽吟靜居勤著述前賢所据採君今不旁掇內充而粹

外燦然備文質

郁葆青約於昧園修禊余偕李拔可冒鶴亭後至  
陳鶴柴劉錫之諸君先在座

詩心收取好春光猶賴微寒勒海棠檐下新陰添幾尺  
水東喬木聳千章引杯華顙曾何語開徑羊求有不忘  
後至我今攜二客貪看花絮坐風廊

海棠謝後作

淺紅嫩綠雜茵苔繡地如何苦費才如此勒花風料峭  
枝頭猶靳小徘徊

爲蔣穀孫題項易庵自畫像

易庵忠義士畫筆如屈鐵自寫面目鰲背變江山色上  
師龍眠描近取波臣訣衣紋制守古儒巾難強裂此心  
繫明社若帶終不絕松巒豈秦赭自灑杜鵑血正類所  
南翁畫蘭題本穴遺民入異代挂史名甘缺君幸附祖  
傳官書殿其末

明末畫人入清不仕者紀載多入清初  
惟易庵雖歿於順治十五年佩文書畫

譜列其名  
於元沐後

爲李拔可題林墩谷書札

子嘗稱晚翠佳句誦在口不死無以進此評孰能否遺  
箋付裝背譜子隱痛久公案三十年因果愈紛糾僻塗  
士自噬枉命歸駢首至今論國是清議翻負咎黨事始



甘陵補袞忠何有譬唐八司馬吾尤惜劉柳

贈李拔可同年

四十一年譬如電回首公車方弱冠今日俱爲六十翁  
齊年座上君差殿遭逢末世所遇同試手功名縫轡線  
何曾謀議見施行不負生平祇詩卷我婚我宦君蹇修  
病讒猶聞呼裹飯再生卜壽必過我贈詩在篋試重玩  
從今蠟屐踏五嶽精力似君宜不倦我猶有母未克從  
君詩借作圖畫看

贈鮑亞白

昔放山陰棹停橈失寶疆今知有越士居更勝陶莊臨

水成村落連峯抱草堂由來清絕思多在鑑湖旁

贈孫綺芬

餘論陳翁挂齒牙獎君才思頗清華著書當闡文恭學  
守道毋慙給諫家腕底織成員嶠錦眼前標建赤城霞  
隔籬呼酒尋常事正復頻勞短巷車

陳子言介  
見求詩

曉望

終夕不成寐樓闌起更憑殷雷旋地軸躍日耀雲層知  
降何方雨都收入曉燈撫床謀再臥那得簟如冰

題黃蔭普母秋燈課子圖

攻苦成名母卽師辛酸惟有一燈知韋家音義源能溯

垣氏風規誠所垂窗几秋深頻夢憶書編舊熟更尋思  
講堂試爲諸生語督責彌勤請業時

劉海粟席間題畫鷹予與座客並補寫黃山松

海青蒼雪雖有種華絳金環徒示寵何如盤翅北黥顛  
志逐不仁蓄其勇俯觀東菲被殘殺毛摯微禽我驚悚  
天生鷲鳥尚不然智效飛翬人作俑看君畫此風飽飭  
反翻歸飛肩側聳爲君補作松鬱蒼上寫玄雲勢瀕洞  
試懸寺壁近殿拱免教鵠羹佛頭冗

爲貴陽凌光庭繪冰髯雪笠圖題之

繡嶺棲霞寒莽蒼雪花翻飛大如掌灑邱掩路翁不惑



單外獨歸憑一杖。皓然林岫。髣髴髮清峙。巖巖相對爽。  
抵家拂笠。竈燎衣笑語兒孫。歲豐穰平生。瘁躬甚濡足。  
義色動人在。誠謹井閭咸慕扶。老籐雷電寧驚妥。親壤  
有弟不愧與。人歌有子且勤讀書幌。記翁風迹狀人紀。  
意欲圖翁披鶴氅。冰天翔步態逍遙。令我拈毫一神往。

爲程吳泉

文龍

繪大泉五千之室圖題之

識君四歐堂。知君博好古。得泉遂顏室。寶若陳氏簠。孫  
吳富銅山。偏霸五六主。貨幣累千萬。銷鑠向何所。昔人  
曾未見一泉。後出土歡喜入君囊。碩果壓前譜。君明止  
足義。用字吳泉父。爲君圖藏室。傳神在阿堵。

題重巖俯視圖贈沈信卿同年

重巖合處瀑光分得路穿林日已曛攀到上方觀下界  
煙塵炊累雨紛紛

爲吳敬臣繪種樹廬贈扇圖題之

一扇能傳夷惠風座旁品概許誰同爲君試寫當時意  
合在川光嶽色中

題白雲堆圖

流香溪畔幾回來樹雪林中屐印苔夢裏幽雲吹不散  
偶然寫作白雲堆

松上凌霄

汝昔結根從糞壤而今攀附上松柯  
移栽爲愛朱顏好  
奈汝終如勢客何

爲陳庸丈繪重宴鹿鳴圖題之

歲蕤月桂本仙苗彩鳳曾銜下絳霄  
洛社耆英齊彥博  
青宮名位重文饒  
榜花五老疑新舉  
燭跋三條憶舊燒  
列坐笙簧雖不奏  
酒邊燕語舌能譟

題秋山圖

築屋跨溪水水聲聽未厭  
嵐光得秋氣  
霜楓發寒豔  
樓高岫益迥  
日出煙還斂  
如此好山居  
盡被僧家占

題畫二絕



作屋背松陰開軒更面林霜晴數峯出水漲一溪深  
明月隱巖背但見水間影孤舟吹笛人不覺溪波冷

晚望

雲罅初銜壁半圓須臾失墮向虞淵銀山一朵風吹動  
銷散層霞杳靄邊

答柳翼謀詒徵

酒畔昨重面溫然柳仲塗安心守藏史有腹是書廚照  
鬢俱霜雪郵詩報畫圖因君思半畝難忘盍山隅

贈陳叔通莫千山

吾曹觀世變迅若電起滅屈指數甲子六十誠一瞥誰

能無幽憂退斯免剛折子今居山中泉竹自怡悅山雖  
名莫干非有尺寸鐵植子所好梅惟共勵冰雪詩功鬢  
增斑禪靜性彌潔於家稱小康於身致大耄古來棟梁  
材必與斧斤絕方得在邱山長葆歲寒節

次韻贈龍榆生赴廣州教授

老友彊邨子所師薪傳雙硯授君持粵船再載今殊昔  
吳社重盟合又離別我江楓微帶醉迎君島楫定含滋  
南行何異田生易道在非徒筮國詞

子弟紛紛誤謬師天南差得一經持若然此道偏隅守  
不爾孤懷舉世離酒醴至關身去就霜華終見腹芳滋

拂衣盡室行何速意內誠多愜我詞

爲梁和鈞題林宗孟雙栝廬圖及其手札

南人不識栝子松誤以檜名呼與同青皮剝落白斑現

三鍼一聚森矛鋒

南人所謂栝也考禹貢注栝卽檜檜柏葉

松身與栝子松絕異

林家院落舊雙栝是松是檜抑是樅

樅松葉柏身

我雖未見竊揣念定復舛謬猶吳儂梁君感逝及此樹  
畫圖完好堂廡空仲文當日撫槐嘆對鏡失面何其凶  
牛腰簡札覩文藻故人墮淚相彌縫海藏樓前五六本  
移地人識鄭相公或成或敗異栝苑爲妖爲瑞難比蹤  
我衰但喻漆園旨却羨擁腫君州榕



題長沙陳伯平中丞遺稿其甥張介祉所輯

從公撫吳日彈指感木淞無能拾碎金衰老內自訟追  
溯垂簾朝憲府尚微諷公言尤亢直清裁最惕衆疊變  
構戊庚國柄成玩弄撫臣嚴舉劾往者寄權重竟連大  
本薤一擊有不中自來綱紀隳國事滋可恫果然未三  
載屋社由一闕吾才愧師魯籌策今覆甕載歌懷舊詞  
零落歲寒夢羊曇公賢甥不忘西州慟辛勤綴遺文拭  
淚爲吟誦

重九和贈余節高

雨後晴光穿樹林樓闌相望一憑臨采萸作會身誰健

隔巷傳詩意自深豈果時平容更視却虞寒甚有難禁  
海壖未有傷高地况是神州漸陸沈

節高目  
警重明

郁葆青約飲於龍門講舍觀鳴社詩卷

退之昔贈東野序歷舉諸鳴喻其詩子今以鳴名子社  
始擇善鳴韓孟師昨朝敷席舊講舍恍若魯殿鳴金絲  
嘉招及我愜羣彥我老不學慙霜髭案頭詩翰雜古物  
接以目覽還手披廿年社集類陳迹矧子感舊嘗有辭  
爲子圖寫在卷首楔日倏忽重陽時從來文會亦義合  
不渝斯久道貴持重子茲社足諷世彈冠結綬紛乖離

哭左氏姑母

太傅盛勳烈叔祖政循良兩家雖貴大子孫無蓋藏吾  
姑初往嬪竹筥貯疏裳儉約秉清德慈仁成義方懿行  
難罄述百爲皆致祥以此登耄耄天道未失常奈何不  
百齡善報僅薄償愛女昔擇壻我慙在東牀亥年我哭  
婦姑適臨我旁女歿更憐壻慮我神暗傷倏忽廿四秋  
我惟一浮湘徘徊舊甥館悲痛割中腸姑今邁微疾精  
魂遂遐翔遺言尚垂念何殊倚閨望自咎書問疏悔恨  
涕泗滂

試茗

貯茗晶壺試沸湯葉端一一吐珠光要知破睡功誰最



厚薄還須水次量

壽黃嘿園母陳太夫人八十

嘿園昔餉我蕨包味芬齒客居念吾母未獲充甘旨  
吾母今失明食不勝脯肺膝下徒有兒何嘗色然喜  
君母亦八旬健飯復聰視是時菊作花君庭燦如綺  
載歌拜慶詩和聲協宮徵別君已廿年君色猶孺子  
孝行必若君斯可老萊比

初冬感懷示載如

始覩申牌放街燈已試明奔車無緩轂落日似殘檠  
何夢堪占卜圖存祇詛盟歸歟食吾力無地可躬耕

西人  
有預

言未來世界  
者亦夢讖也

次韻答子言

君老詩騷國平章亦至公於名符衆譽每見斂吾躬骨  
瘦身如鶴神超目送鴻卅年盟在社餘子孰能同

陽曆歲日觀舞

今夕誠何夕迎新曆漫同座旁春可可簾內熱炯炯舞  
逐星羅密歌隨電激鼓滿場明復暗雜奏起賡終蠟地  
揩逾鏡蠻鞋跣似弓戲排花面陣恍入細腰宮亦用敦  
槃際遑虞禮樂攻若云傷國俗未免訝冬烘復活耶真  
聖爲歡我已翁腐心酬此會勞目看當中迷醉皆金紙

昏沈作霧霏回車大衢過燈旆惱年紅

爲傅沅叔題西涯校書圖

得書供校讐訂訛資考據何

義門

黃堯圃

惟存真功亦

次孫

淵如

顧千里

君本天祿人劫後寺齋住博收兼約

取卷卷有眉注昔校涑水編獲勘武英誤用知舊鈔貴  
契心領茲趣吾儕非佞宋正爾豕魚懼從君載一甌其  
憲發吾慮晦翁刊易傳書肆煩告語揣想宋士夫矜慎  
多佳處誠齋勤批書勞績寒巖昨西涯君食邑此圖卽  
掌故

題畫面壁僧



松柯覆峯顛散亂老僧髮蒲團耐堅坐此身亦石佛

題春溪散策圖

溪山幽絕處雜樹始青葱沿流一散策懷袖滿春風

題松谷圖

雪瀑穿巖下樓臺隱谷深長松窺曲磴喬木蔽高岑如  
答回歌嘯其鳴雜筑琴天風振衣袂扶杖一登臨

題溪居圖

築廬不負溪山好清景須能面面收閉戶奴常耽晝睡  
在林鳥自異天囚石間雲起將排闥蘋末風生欲滿樓  
呼與鄰翁來盡醉往還相約一扁舟

題山閣雲濤圖

閣寺相望寺更高中間有路隔雲濤  
瞻明聶許曾何賴惟聽松風谷底號

題漁戲圖

何當相約兩垂綸泊宅煙波戲作隣  
大好江山只陳迹鑑湖嚴瀨久無人

題巖谷朝暉圖

無名幽境是深山巖谷朝暉發霽顏  
幾樹綠明煙霧底但聞啼鳥自關關

題陽羨溪山圖

溪深山折處村舍勝樓臺幸免塗金碧猶然蔽草萊倒  
巖松作蓋瀉瀑壑爲杯何用求田計扁舟旦夕來

題樂業圖

有田可安耕有溪可安漁有林安樵采有寺安僧徒秧  
歌答漁歌樵唱和鐘魚峯嵐列屏嶂松籟調笙竽結廬  
得斯境朝夕親詩書安命樂吾業吾道誠不孤

題黃山大幃子

平生心醉北黟山胸次難消魂磊般翦取奇峯二兩朵  
槎枒插在白雲間

題秋山蕭寺圖



地迴霜信早高林色斑爛鐘聲出深谷雲光斷遙山但  
見古寺門危跨兩崖間光公夙所契往豈一飯慳腰脚  
老已慵未能勤躋攀何當換僧服一入不復還恐被世  
人料畫餅成譏訕

除夕和公渚祭詩韻

人爲愈巧世尤危聞見荒唐溷我詩事變萬端難古例  
名詞些少入文宜干支換字鐘先報非刺無功筆最知  
會欲共君安醬甌未須留與後來期

元夕雪以下丙子

元宵降雪如元日玉屑紛紛挂雨絲大地稍憑將劫掩

閨年最惱見春遲  
寢衣似水賢於坐  
硯墨生冰聖得知  
百葉窗頭明粉壁  
夢回誤道月來窺

題徐丹甫芳蠟心室徽州十詠

示我胸間數朵峯  
生從黃海一枝筇  
客居歲月吟邊過  
層累相高石上松

一卷都如畫裏禪  
紫陽峯下住詩仙  
柘林梓竹春仍好  
底事芳心一室蠟

丹甫贈黃山梅二本賦謝

此梅舊在黃山麓  
相贈今成一段奇  
他日吾園得花看  
應教君動故園思

筆底黃山少化工難催梅意向  
冲融勞君移取黃山樹  
兩兩奇枝到眼中

超山觀梅

漫愁年病不成春  
襖後看梅意轉新  
花路密通三十里  
竹輿便載一行人  
俯茲原隰如塗粉  
底處山林得效顰  
我欲安床龍洞畔  
歲時來坐老閒身

臨平山安隱寺

古梅何年穴其腹  
竹節漫隨仙杖曲  
寺階數級石爲崖  
門外一泓泉貯玉  
看花飲水兩俱好  
水可滌煩花醒目  
梅年不必爭宋唐  
泉昔輸城日萬斛  
拙而抱甕卽養生



不夭天年同此木古來仙迹皆茫然企望丹成亦奢欲  
孫景熙約游大場別業

先輩交深子弟親傾談彌吐肺肝真卽看丘壑胸中是  
更見池亭却後新竹翠上籬暄薄午桃緋滿砌染餘春  
似君休沐饒清咏相約郊游豈厭頻

無名英雄墓者壬申吳淞戰役所死士也在廟行  
左近過而傷之

國殤今日矗豐碑却異旌忠與建祠道左諸坊良可念  
冢中枯骨豈曾知戮身敵或嘲京觀涉足吾如復敗棋  
尺籍伍符名不具戰場何故枉橫屍

李釋戡招赴秦淮修禊未赴分韻得雁字

去年二月雪壓桃今年三月梅始綻我身已感物象乖  
何況知時如候雁盛寒入禊水之濱儻亦諸公非所慣  
秦淮溯流及崑盧荒意而今昔無閒流杯取酌斯可耳  
何殊東晉山陰澗從來禊事謝不祥祓除意貴身無患  
永和風流一緬想裙屐畫圖供取辦

爲梁衆異題湯定之畫梅

衣鉢閒庵墨法腴黃冠客後有雙于寫來真解梅中趣  
贈與知諳物外娛著得妍花枝可醜相茲豐骨氣仍臞  
伴君詩夢淞簾雨江畔垂垂第幾株

哭高夢日

閩士三高若鳳麟交君最久最相親山林大敗憑藍萼  
羹飯羅前棄土塵萬事精思言破的百端學術世迎新  
後生私謚持何語須識先生德至醇

病骨那禁蜀道難峽哀入誦夜漫漫憂深奚適求安枕

食減驚看對釘盤譽我昔游恆在念

十餘年前同游天目吾爲之導君常

譽之以爲游侶無過於我

思君後會益無歡交期遽使今朝盡終面

惟餘一撫棺

爲吳湖帆題唐子畏山陰修禊圖文衡山書楔序

合卷



正嘉以來崇士氣北派惟推唐子畏近當石田分半席  
遠紹河陽樹新幟圖中人物追晉風澹遠蕭寥盡姿致  
補書楔序衡山翁自哂廢忘實精粹此書此畫誰倒裝  
未可論年議其僞醜移跋語或亦然離之兩美合尤貴  
四王而下入甜熟學之不善翻爲累文唐筆法豈便爾  
貶北尚南毋乃隘有明畫院與草野抨擊成風相勝敗  
區區一藝且如斯無怪家居被撞壞唐生一試考詞連  
文翁待詔逢譏誅儻非身隱書畫間讒死寧能異周位  
偕姚虞琴陳子康游松江三泖泖中長水塔院明  
屠隆爲碑記今顏敗矣

吾舟鼓浪自前行滿耳風聲挾水聲急雨數番珠亂旋  
須臾仍展簾紋平

遠陂帖水畫長蛾小樹低圓碧勝螺煙視漸通橫柳外  
娟娟一塔影凌波

飛甍遙望一層層近怯顏闌不受登寺穫三分官取二  
貧餘獨犬伴孤僧

醉白池

二陸遺踪亦已遐山川人物總清嘉新陰古蔭今相互  
畫味詩心此最賒池榭舊經三百載芙蓉晚颭一枝花  
試看煙客題堂字珍護能勝壁上紗

爲蔣蘇盦繪烏榜新邨圖題之

葦榭安樓傍定香錫名烏榜合題坊因依竹石如甥館  
羅列杯棬有影堂閉戶靜容耽著述采蘋時用助烝嘗  
性情文字彌肫摯記語真能半世詳

題琴隱圖

山齋午倦欲拋書待汝攜琴過我廬收拾嵐光作屏幃  
招邀松吹滿庭除固知絃外無幽侶聊向圖中覓隱居  
何事君章志伊呂次都取足在全軀

題釣隱圖

歸已無田可力耕江湖泊宅慰平生畫中自寫垂綸意



祇釣魚兒不釣名

題歸樵圖

幾重嶺路勢岩堯一片秋光慰寂寥  
赴壑奔泉繞危磴穿林步步下歸樵

題寒林赤峯圖

漾漾溪光白藹藹山容碧秋林葉盡如岸幘  
皎然天外一峯赤歲寒眼底已豁蒙聊借霜毫寫泉石

題崖寺晚鐘圖

石澗水澄澈潛盤重復重懸崖覆古寺修瀑隱長松  
欲識千尋路時聞幾杵鐘到門如卷幔烟外見羣峯

題霜峯柱笏圖

霜林豔吐濃春石壑光搖玉津天畔羣峯柱笏雲間一  
瀑垂紳

俗有腰纏十萬貫騎鶴上揚州之諺一富賈倩人  
畫之求題

我游二十四橋邊拄杖猶慳買酒錢安得腰金換靈藥  
素雲黃鶴擁詞仙

題霜林圖

費盡霜華染就山朱朱碧碧色爛斑霞緋散入瓊雲裏  
渾似佳人薄醉顏

題匡廬獅子塔圖

山徑一林松蒼烟與開闔奇峯出木杪突兀獅子塔寺  
樓故相望碧嶂復周匝翦裁入此紙若縫老僧衲巖壑  
不吾欺聚景未傷雜自是吾家山倘亦北苑法

次韻和冀野

識君真如齋氣豪語玩世指言杯中物悅性此其最醉  
時抗聲歌咀嚼宮徵味歌君自度曲聽者知有謂南音  
久濫觴衣鉢梁與魏君爲元樂府復古見深致於吾不  
菲薄豈是相黨比胸次鍼芥投朋交合由義昨者馳詩  
箋章成不易字吾衰畏後生願借他山礪



爲黃公渚題葉氏天籟軒朋交投贈詩詞冊

葉家四世玉堂人詞翰風流迹已陳  
零落朋箋入君手寶茲鄉獻未全淪

土炭酸醎譬好詞重輕豈必在人知  
我因細檢班朝錄名字分明不盡遺

題汪仲虎同年趣園圖

著書維人紀成功不在位豈曰藝及冬  
而懼遭彫世汪君績學儒條辯庸言義  
寫定藏名山篇目一家萃松子賦來歸  
鄭敬遂初志有園可日涉時復董帷閉

黃石孫丈挽辭

諫草存遺篋堂堂白馬生敵防疽食患國慮首施傾不  
幸言皆中相看世屢更宦遊朱邑比終有不忘民  
我遊諸子際仲子最相親述德知明哲遭時賦厄屯瑟  
琴胡久徹瞻拜竟無因繼志誠非易傷哉是忍貧

答陳寥士

來挾句章色跼然款我扉有氎敷客座無火逐寒威詩  
道今將廢吟懷老漸稀置郵傳日課羨子富珠璣

題山館論文圖

俗儒驚浮名文譽日挑取用茲博利祿惑衆類吹蠱學  
者遑爲人吾曹自攻苦釋悔從蔡邕爲論念張禹庶幾

忍古徒朝夕共尊俎

和林子有新居落成

容身地已過壺公似我初營一畝宮  
屏跡豈須人境遠  
安巢並傍海崖東  
得留客座青氍毹在  
避却塵衢曲巷通  
準料橐駝能慰子  
移春梅萼占先紅

爲陳鶴孫題其先德子鶴尚書家書及萬文敏公

代草死事上書冊子

祺祥事祕誰能說  
驂乘禍萌冤莫雪  
軍城流蔡一孤臣  
授命猶然完大節  
遺牋隱翳讀難詳  
燹燼藏樓惜灰滅  
眼明茲冊粲墨花  
志清若絃且廉折  
從來小智惡大謀



譴死女陵況言泄不濟則死忠成敗陶堂詩語至哀切  
誼同朱震藕於草死事上書縱昭揭中興簾殿五十春  
國脈如絲俄斬絕何曾直筆待董狐功罪不明惟史帙  
涵芬樓藏有尚書遺札述祺祥事變文字縱橫  
參錯不易尋讀惜壬申間北兵燹與藏書俱焚

爲陳鶴孫題其先德讀書秋樹根圖圖爲閔孝子

貞所繪

顧陸傳神骨法尊正齋於古獲真源圖中一老閒持卷  
林下三秋淨浴暎却道植才如種樹亦聞潤葉必流根  
庭階喬木青無恙世業堂堂洛誦孫

爲陳鶴孫題其先德鍾溪侍郎摯書圖

明之行卷少完帙乾嘉崇學善本出侍郎得士使摯書  
意必於茲定評隲古賢仕學通治理科第端須曉經術  
僅憑帖括致巍科孰是名駒孰繭栗公門請業日造膝  
用覘百士不失一晉祁蜀卓賢輔弼河汾禮樂盛文質  
羅兩峯方白蓮繪暗香圖吳湖帆夫婦補寫疎影

索題

兩峯密萼子疏枝古法相承不我欺跡妙豈爲風氣囿  
一般浮譽那真知

君家夫婦比羅方未是前賢較後強此事相師不相襲  
肯教一筆落尋常

閨檐韻事兩嬋娟花汁清新石黛妍朱草詩林梅景屋  
樵元規宋各通禪

祀竈日立春

亦謂差承羨知時鳥戢翰一家窮海角十載此樓闌呵  
墨題春帖移花佐臘盤殷勤呼子郭來日或相寬

太玄  
羨後

爲差準易小過  
以當立春節

人日攜婦孺趙家花園看梅以下丁丑

隔歲春先動早梅宜上簪提攜踏青候衰老愛花心萬  
樹聞橋北一村淞水潄流冰溝凍解受日陌泥深鳥爪  
畦多跡牛蹄路伏岑莫嫌緇素韞正爾暢行襟導客童



能慣肩鋤婦可任折枝都入市雜木更成林比似年登穀真同地布金兵來曾不犯吏悟遂無侵桑海誠非料桃源漫遠尋歸耕寧視此離亂到而今

爲徐丹甫題其先德鐵生先生詩縣令圖

淵淳山峙覩遺容早在清倫鑒識中何止操刀成美錦一般治理喻詩功

公孫未忍去桐鄉不獨遺民守冢旁終把一麾完大節還應廟貌比睢陽

爲王仲武題所藏畫冊

隸家相承止紙墨反於古法無所得氣韻豈與形似離

古賢取象要不惑金陵八家能寫實筆蹤妙在兼南北  
渲淡無妨點拂濃樸質功夫在鉤勒半千沈鬱誰敢憎  
方魯經營匪矜飾遠度縱橫出嚴整蔚生洗囂由靜默  
茲冊獲四已足雄況復諸家相羽翼二胡造意入逸品  
陳柳風流精拂拭其餘四子亦能手畫史所遺尤見特  
我嘗論畫謂宜廣立派未免小封域華亭太倉各門戶  
揚彼抑此皆耳食金陵諸子豈後彼宋元假此得消息  
君今什襲重鄉賢此意堂堂善知識

正月十一日汀洲伊墨卿太守生日李拔可招飲  
墨巢徧觀所藏太守遺跡因次太守壽歐陽文

忠韻壽之

論書透網魚鱗白是公受法諸城日偏工永字十五年  
以指畫肚夜不眠溜雨懸崖荒蘚翠古釵脚插峨峨髻  
公書愈大氣愈壯旁薄尤能恢隸意風流照耀乾嘉朝  
人書並異今所遭墨巢重金換一紙硯田歿後仍豐苗  
年時試燈風乍起以酒壽公墨巢始大盤首具伊府麪  
海錯烹調重鄉里通神入畫世罕知秋水園圖耐我思  
墨巢壁上一松在略見龍睛握筆時正傳豈有旁枝節  
無智人前不須說謂公道眼觀天真緩叟語言誠妙絕

劉文清書初從趙文敏入墨卿受筆法於文清而不喜  
趙何子貞贈詩有云不將俗書薄文清觀破天真關道



眼蓋謂  
此也

爲馬武仲題媚秋堂尋詩圖

海南四時春夏氣君獨藏懷滿秋味碧梧一樹日玩芳  
收拾西風入吟思君家廊館最精潔比似倪迂坐清秘  
圖書小印要雙鈐畫本題詞重唐荔我聞疲齋稱粵士  
於君娓娓述韻事我雖未面已神往心念小山有叢桂  
安能渡海謀一醉就君彝鼎讀銘字飽君蔬筍誦君詩  
挹取白露滌肝肺

爲陳伯任題其亡姬梁竹漪小像

落梅妝閣拂東風淒絕朝雲唱褪紅百轉春鶯聲最慧

一般見色卽虛空

十洲仙路縱迢迢再世應能返玉簫約指殉棺終不改  
名香奚用倩魂招

函光佳俠總含情更恐丹青畫不成道是鶴歸空有恨  
愁吟正似鄭周卿

新詠篇篇出玉臺徐陵妙選比瓊瑰我慚未有陰鏗句  
慰子還如何曼才

YORK UNIVERSITY

JUL 03 2001

EAST ASIAN STUDIES

珍做宋版印



長發寶圖

谷軒

中華書局

上海

長發寶圖

上海

中華書局

中華書局

上海

中華書局

上海

中華書局

上海



中華書局

上海

中華書局

上海

中華書局

中華民國二十六年十一月

古

